

Santiago

Jacheuayama

1 ¹ Atše Santiago, Bèngbe Bètsá y Bèngbe Utabná Jesucristbe canÿe oservená, tšèngaftanga cbontsèbuabiamná, tšèngaftanga chè bnètsana uta Israeloca bèts pamíllangbioye nÿets luarèjana ujquèshenènga. Atše cbontsacheuaná.

Chè Bèngbe Bètsábiocana osertánana

² Jesucristbeyeca atšbe catsátanga, tšèngaftanga ndaye padecena soyènguiñe chašmojtziyena ora, chiñe šmochjájuaoye mo chca tšèngaftangbe tšabiama cuaftsemncá y šmochjóyejuaye; ³ er tšèngaftanga šmondétatšèmbó, chcañe chašmojtsajna ora, šmochtsetátšèmbó cach tšèngaftanga Jesucristbeñe puerte šmošbuaché o ndoñe. Chca ora bèts ošbuáchiyana chašmojtsebomnèse, šmochanjobenaye, Bèngbe Bètsábeñe jtsobátmanèse añémoca jtsemnana, masque padecena soyènguiñe chašmotsomñèse.

⁴ Pero chca chašmojtsemnèse, šmochtsentšena jashjáchama ntšamo canÿe entšá Bèngbe Bètsabe soyèngama corente osertaná yomncá chašmotsemnana, ntšamo Bèngbe Bètsá yobošcá chašmotsiyenama, chiñe ni mo canÿe soye jamama chacmondétsabuashebenèse.

⁵ Nderado nda tšèngaftanguentsana ndoñe tontsobena corente osertánana jtsebomnana, cha bontsemna Bèngbe Bètsá jaimpádana cha chaoma aíñe chana jtsebomnana, y Bèngbe Bètsá chana bochanjátsetaye; er Bèngbe Bètsá nÿetscanga bètscá endbètsatšatnaye y ndocnábioye jatáboyènjana. ⁶ Pero cha bontsemna, Bèngbe Bètsábeñe puerte jtsošbuáchiyèse chama cha jaimpádana, y cha nderado ndoñe bochanjóyeunayama ntjatatèmnancá. Nda mèntšá tojtsamèse, inÿe ora aíñe Bèngbe Bètsábeñe cuaftsošbuachecá y inÿe ora ndoñe, cha entsemna mo canÿe olèshcá, mar béjayoca binÿia nÿe cátatoye jtsambayana. ⁷ Chca ama entšá ndoñe chaondètsejuabná, Bèngbe Utabnábéntšana ndayánaca jatóyèngacñama. ⁸ Cha jtsemnana canÿe entšá, mora canÿe soye juabnayá, pero chentsana inÿetšá jatójuabnañana. Chca, cha jtsiyenana nÿetsca soyèngama uta soye jtsejuabnayèse, y chca cha ndoñe ntsoobenana tondaye puerte tšabá jamama.

⁹ Chè Jesucristbeñe ošbuachiyá, ndbomnjema y ndoñe yapa uámana entšá tomná, corente oyejuayá chaotsemna, er Bèngbe Bètsabe bominÿiñe cha canÿe uámana entšá jtsemnana; ¹⁰ y chè bomnánaca puerte oyejuayá chaotsemna, Bèngbe Bètsá chábioye nduámana

entsá chabojábema ora, er mo chë shacuaníne uantšefjushacá, cha ndoñe nyets tempo quem luarentšë ntjéftsiyenana. ¹¹ Shinje tojábocna y becá tojojënyana ora, chë shácuaa jtsebuashana, chë uantšefjúsha jtsátsatsána y chabe uabótamanana ya ndoñe más ntsebínynana. Cachá chë bomná, echanjóbana nye cachabiamá más becá crocénana onguayíne chaojtsemna ora.

**Bacna soye ocochënguentsána
tšabá jabocnana**

¹² Oyejuayá chaotsemna chë entsá chë padecena soyënguentsána tšabá tojtšbocná, cabá Jesucristbeñe ošbuachiyá; chama Bëngbe Bëtsá chabiamá oyejuayá echántsemna y echanjama chë nyetsca tescama yomna tšabe vida cha chaotsebomnama, mo uacananacá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbiye. ¹³ Nderado nda bacna soye jamama tbojócochëngo, ndoñe chaondësejuabná Bëngbe Bëtsá chca cháftaca vojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínÿenga bacna soye jamama chaócochënguama. ¹⁴ Inÿetšá endmëna, canya bacna soye jamama jócochënguana, bacna juabnënga tojtsebomna ora; cha chiñe nye jësejuabnayana y chë soye jtsasjayana cha chca jamama. ¹⁵ Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacistíga.

¹⁶ Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá vojtsama tšëngaftanga bacna

soyënga chašmotsamama ca. ¹⁷ Nyetsca tšabe soyënga y chë puerte tšabe soyënga tšbanánocana endobá, Bëngbe Bëtsá chë Taitábíocana. Y cha chë shinje, juashcona, y nyetsca chë celoca yobuashinÿinÿana soyënga tojamá, nyets tempo nye cachá uesomñe y ndoñe inÿa ntjátsmëna. ¹⁸ Cachá jamama tojánbošenayeca, bënga chábenga šojánabiamá, bënga chabe ndegombre palabrënga jouenëse. Cha chca tojama, lempe ntšamo Bëngbe Bëtsá quem luarentšë tojamentsána, bënga chë natsanënga chábenga chamotsemnama.

**Ntšamo ndegombre yomna Bëngbe
Bëtsábíoye tšabá jadórama**

¹⁹ Atšbe bonshana catšátanga, quem soyama šmochtsenójuabnaye: nyetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámnaca. ²⁰ Inÿaftaca tbojetna ora, canye entsá ndoñe ntsamana ntšamo Bëngbe Bëtsá yobošcá, chë nyetsca soyënguiñe tšabá jtsamana. ²¹ Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

²² Ndoñe quecmátamna nye chë Bëngbe Bëtsabe buayenánana jouenana, ndayá ntšamo cha tojayancá añe jtsamana; ndoñe chca šmontsamëse, cach tšëngaftanga šmontsenoíngña. ²³ Nda nye chë buayenánana tojouena, pero betesco tbojtsebnatjëmbe y ndoñe

tontsama ntšamo chiñe tojtsayancá, cha jtsemnana mo canye entšá chabe jubíá espejuíñe tojtsenonýacá: ²⁴ chana cachá jtseónýayana, pero chë espejo tojabuertaná ora, jtsebnatjëmbana ntšamo cha bëtsemnama. ²⁵ Pero nda ntšamo tojouencá ndoñe tbonjebnatjëmba, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguëntse endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

²⁶ Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabiana tondaye ntsámanana. ²⁷ Bëngbe Bëtsá chë Taitabe bominyiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nye quem luarama enójuabnayënga mondbetsamcá.

**Nyetscanga tšabá
jtsatenonýayëngana**

2 ¹ Tšëngaftanga, Jesucristbeyeca atšbe catsátanga, šmondošbuachë Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nyetsca entšanga cachcá jtsatenonýayëngana. ²⁻³ Nderado tšëngaftanga cányëntse šmojënefjna, y chora canye bomna entšá tojášhango castellano ntšabuchëtjonëfjangaca y uamana

entsáyëjuangaca bopormaná, cha botamana šmojúmashëngo y mëntšá šmojuayana: “Moca quëfseroca mabesótbema ca”. Pero cachca ora, canye ndbomnjëjema tojášhango uandocuenta entsáyá uichëtjoná, y cha šmojuayana: “Acna choca tsanana cochtsemna o chafjoca mótbema ca”. ⁴ Chca tšëngaftanga ya šmontsama cach tšëngaftanguëntse báseftanga más uámanënga ínÿëngbiana chamotsemnana, y chca šmojtsama, ana bacna juabnënga šmojtsebmna causa.

⁵ Atšbe bonshana catsátanga, quem soye šmochjouena: Bëngbe Bëtsá quem luarentse ndbomnënga imomnënga tojabacacá, chënga canye puerte uamana soye chamotsebmnama, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatsatayama tojašebuachená; ⁶ pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsënyayana. Ndegombre, chë bomnënga mondmëna chë nye sempre cmondbëtsamëndayënga y chë sjojónana chë pueblentsá mandadëngbioye cmondbáunatsënga. ⁷ Y cach bomnëngnaca mondmëna chë Cristbiana podescá oyebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduamana.

⁸ Bëngbe Bëtsabe uabemana palabrenguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá

šmochántsama. ⁹ Pero tšëngaftanga ndoñe cachcá šmotsenonjase, chcana bacna soye jtsamana y šmojama ntšamo Bëngbe Bëtsabe leyënguñe ndoñe yondëlesenciancá. ¹⁰ Y mora, canye entsá nyetsca chë leyentša mandënga tojtsobedecena, pero ndoñe tontsama ntšamo nye mo canye mando ntšamo iuayancá, cha Bëngbe Bëtsabiama jtsemnana canya ntšamo nyetsca chë leyentša mandënguñe ndoñe yondëlesenciancá amá. ¹¹ Cach Bëngbe Bëtsá, chë “acbe shema o boyábioye ínÿaftaca ndoñe cattsefngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shémbioye ínÿaftaca ndoñe tbonjaingñé, pero aíne ínÿabioye tbojóba, chca, Bëngbe Bëtsabiama cha jtsemnana canya nyetsca chë leyentša mandënga ndocumpliná.

¹² Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entsangcá, er Bëngbe Bëtsá echanjayana ntšamo tmojamcá aíne o ndoñe tšabá bëtsemnana. ¹³ Er chë ínÿengbiama ndoñe ngménana bomnëngbiama, Bëngbe Bëtsá ntjongmiacá echanjayana ntšamo tmojamcá aíne o ndoñe tšabá bëtsemnana; pero chë ínÿengbiama aíne ngménana bomnëngbiama, ntšamo tmojamcá aíne o ndoñe tšabá bëtsemnana Bëngbe Bëtsá chaojayana ora, chënga tšabá chentšana mochanjábocana.

**Chë ndegombre ošbuáchiyana,
soyëngaca jinÿanÿiyana**

¹⁴ Atšbe catšátanga, ñdayama cánÿabioye buanjóservia jayanana aíne Jesucristbeñe sëntsošbuaché ca, pero cha ínÿengbiama tšabe

soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchemá? Ndegombre, cha nye chca tojtsichámëse, ndoñe ntsopodénana cha atsbočaná chaotsemnana. ¹⁵ Nderado canye boyabása o shembása ošbuachiyá entsáyá tbojtsabuáshbena y saná chë te jasámnaca tbojtsebuáshbena, ¹⁶ y canya tšëngaftanguentšá tbojauyana: “Diošoftá, sësnama ndoñe chacondëtsepadedecena y becá chacuatoshachá ca”, pero chca chaotsemnana chábioye tondaye tbonjatšetase, ñdayama nantsoservena chca jayanana? ¹⁷ Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnana jinÿanÿiyama, nye chca ošbuáchiyana jtsebomnana tondayama ntsoservénana.

¹⁸ Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiama tšabe soyënga séntsama ca.” Chora atše stjojuá: “Šminÿinÿé ntšamo canya nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” ¹⁹ Aca condošbuaché nye canye Bëngbe Bëtsá yomnana y chca tšabá contsama; pero chë bacna bayëjngnaca chiñe jtsošbuáchiyana, y chë causa chënga uatjana jtsebomnana y jtsangmëmnyana. ²⁰ Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsosbuaché, pero tondaye tontsama chca chaotsinÿnama, chabe ošbuáchiyana tondayama ntsoservénana. ²¹ Bëngbe Bëtsá tojánayana chabe bominÿiñe Abraham, bëngbe tempasca bëtš taitá, tšabia

yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama. ²² Aca contsobena Abrahámbeñe jinýama, cha Bëngbe Bëtsábeñe yojanošbuáchema, y soyënga yojánama chca chaotsinýnama; y ndayá cha tojanmama entsinýinýena, cha ndegombre puerte bëtscá yojanošbuáchema. ²³ Chca tojanopasá ntšamo Bëngbe Bëtsabe uabemana palabrenguiñe endayancá, mëntsá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominýiñe cha tšabia yojamna ca.” Y Abraham entsanabaina Bëngbe Bëtsabe amigo ca.

²⁴ Y tšëngaftanga šmontsetátšëmbo, Bëngbe Bëtsá ináyana canýe entšá chabe bominýiñe tšabia yomna ca, chë entšá ndayá tojtsamama, chabe ošbuáchiyana chaotsinýnama, y ndoñe nýe ošbuáchiyana tojtsebomnama.

²⁵ Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominýiñe cha tšabia yojamna ca, er cha canýe tšabe soye tojanma. Cha chë noticia uambaye judiënga posada tojanéyentšame, y chentšana tojanéjabuache inýe benachëjana chamuáisebocanama, chë pueblentšá soldadëngbiana chamotsachetama.

²⁶ Lempe básefta palabrenguiñe jayanamna mëntsá entsemna: ntšamo canýe cuerpo, espíritu ndbomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinýnama, tondayama ntoservénana.

Bichtájaca tšabá jóyebuambayama endmëna

3 ¹ Jesucristbeyeca atšbe catšátanga, ndoñe yapa

buatëmbayënga tšëngaftangbeñe chamondëtsemna; er tšëngaftanga ya šmondétatšëmbo, bënga, chë entšanga abuátambayëngbiana, chë castigo más bëtscá yochtsemnama, Bëngbe Bëtsá ndoñe tmonjóyeunase, ntšamo entšanga tmojamama aíñe o ndoñe tšabá bëtsemnama cha chaojayana ora. ² Bënga nýetscanga nýetsca bacna soyënga mondbëtsama. Nderado nda oyebuambnanyiñe ni mo canýe bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtse nomándayama.

³ Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nýets chëngbe cuérpoca tmojtsamcá jtsemándayana, y ndoñe nýe chëngbe bestšaše. ⁴ Barquëshamnaca šmochjenójuaboje. Masque tša bëtsëtsacuemëngá y tša jabuache binýiënga chë barco jtsëjuatsëntšayana, chë uamanéjayënga chë barco juyambana ndayëjana tmojtsebošcá, y chca, nýe canýe base soyetëmaca, timón ca uabainëtëmaca. ⁵ Cachcá, chë bichtajaca cuerpiñe canýe base soyetema endmëna, pero chë bichtájaca entšanga jtse nábotamnayana bëts soyënga tmojamama. Šmochjouena, canýe base íñeshe jtsobenana canýe bëts tjañe juangbotjuama. ⁶ Y chë bichtajaca endmëna mo canýe íñeshcá, mo canýe luare ndayentse puerte bacna soyënga tobinýncá. Chë bichtajaca jtsobenana bëngbe cuerpentse puerte bacna soyënga bëngbiana jamama. Mo canýe íñeshe becá tojtse ndiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiana jamama nýets tempo quem

luarentše tmuetsiyenentscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

⁷Entsá endobena jtsaméndayana nyetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsaménda; ⁸pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauétsabinñyana, y mo canye mëtscuaycá veneno jtsobmnana jóbama, chë bichtájna cachcá endmëna. ⁹Bichtájaca bënga puerte tšabá Bëngbe Bëtsá y Taitabiana jtsichámuana, y cach bichtájaca bënga puerte bacá entsangbiana mondbëtsichamo, masque Bëngbe Bëtsá cachacá enoparecénënga chënga tojábiana. ¹⁰Cach uayásëntšana jtsóbocanana Bëngbe Bëtsabiana tšabe palabrénga y entsangbiana bacna palabrénga. Jesucristbeyeca atšbe catšátanga, chca ndoñe chaondëtsemna.

¹¹Canye béjaye obocantšana ndoñe ntsopodénana tšabe býyeshe chaóbcnoma y cachentšana untja býyeshnaca. ¹²Ntšamo canye higo betiyentšana ndoñe ntsopodénana olivosëšënga jashacama, y canye uvas betiyentšana ndoñe ntsopodénana higuëbenga jashacama, cachcá, atšbe catšátanga, tamona býyeshentšana ndoñe ntsopodénana tšabe býyeshe chaóbcnoma.

Bëngbe Bëtsábocana óbocana osertánana

¹³Nderado tšëngaftanguentše tojtsemna canye puerte tatšëmbuá y osertaná, cha bontsemna, chca yomnama entsanga jinñanñiyana,

tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama.

¹⁴Pero tšëngaftangbe ainaniñe yapa ínñabioye šmojtsántšaboše y nye ínñënga chamotjáyana soyënga šmojtsama, as ndoñe šmattsenábotamnaye osertánënga y tšábënga šmomnama, er ndegombre Bëngbe Bëtsabe osertánana tšëngaftanga ndoñe šmontsebomna. ¹⁵Er chca osertánana, Bëngbe Bëtsábocana ndoñe ntsóbocanana, ndayá nye quem luarama enójuabnayëngbentšana, nye entsangbe juabnentšana, y canye bacna bayéjbentšana. ¹⁶Ndayentše entsanga yapa tmojtsenántšaboše, y nye ínñënga chamotjáyana soyënga tmojtsama, chentše tondayama quemochátenëyeunana y nyetsca bacna soyënga mochántsama.

¹⁷Pero chë Bëngbe Bëtsábocana óbocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínñënga ndoñe chamondétsentsjanama amënga, tšábënga y sempre jtseprontánana ínñënga joyaunayama. Y cach quemënga jtsemnana ínñëngbiana ngménana bomnënga, siempre tšabe soyënga jtsamana, cachcá nyetsca entsángbioye jtsénñayana, y ntšamo ndegombre tojtsemncá jtsichámuana y jtsamana. ¹⁸Ntšamo canye jená, botamana shajuana jtsebomnama tšabe jénaye jájena, cachcá, siempre natjémbana jtsiyenama bošënga, natjémbana ínñëngaftaca jtsiyenana, chca, nyetsca entsanga chamotsamama ntšamo Bëngbe Bëtsabe bominiñe tšabá yomncá.

**Šmochtsiyena Bëngbe Bëtsá
tšëngaftangbeñe jtsemándayëse**

4 ¹ ¿Ndayentsana chë
tšëngaftanga jtsentsjanayama
y jtsepenzétsiyama yóbocana?
Endóbocana chë tšëngaftangbe
bacna juabnënguentsana, nÿe cach
tšëngaftanga tšabá jtsomñama; y
chë soyënga tšëngaftangbe ainaniñe
sempre chë tšabe juabnëngama contra
jësemnana. ² Tšëngaftanga ndayánaca
jtsebomnama šmojtseboše, pero chca
jtsebomnama ndoñe šmontsobena,
as jtseprontánana ínÿengbioye
jtsëbáyama. Inÿa ntšamo toбомncá
tšëngaftanga tša jtsántšabošana, y chë
soye jashjáchama ndoñe šmontsobena
ora, ínÿengaftaca jentjáyanganana
y jtsepenzétsiyana. Ntšamo
šmojtsebošcá ndoñe ntjobenayana
jtsebomnama, Bëngbe Bëtsá chama
ndoñe šmondbotjañe causa; ³ y chë
soye šmojtjañe ora, tšëngaftanga
ndoñe ntjójyëngacñana, ndoñe
botamana chë soye šmondbotjañe
causa, er tšëngaftanga chë soye
jtsebošana nÿe chaoservema
oyejuayënga bacna soyënguñie
jtsomñama.

⁴ ¡Tšëngaftanga, Bëngbe Bëtsá
bobonshánana šmojtšajbananga!
¿Ndoñe šmondétatšëmbo, chë
jtsebošana nÿe quem luarama
enójuabnayëngbe amigo jtsemnama
y nÿe quem luarentša soyënga
jtsebomnama, chca, canÿe entsá
Bëngbe Bëtsabe uayayá jtsemnana?
Ndánaca tojajuabó nÿe quem luarama
enójuabnayëngbe amigo jtsemnama,
chca, canÿe Bëngbe Bëtsábioye
uayayá jóbemana. ⁵ Ndoñe nÿe
bonamente Bëngbe Bëtsabe uabemana
palabrënguñie mëntsá endayana:
“Chë Bëngbe Bëtsá tbojanichmó

bëngbe ainaniñe chaotsiyenama
Uámana Espíritu, puerte entseboše
nÿe Bëngbe Bëtsá canÿa bëngbe
amëndayá chaotsemnana ca.” ⁶ Pero
Bëngbe Bëtsá, bëngbe tšabiamna
jtsejuabnayëse bënga jtsejuabuáchanana,
chíyeca Bëngbe Bëtsabe uabemana
palabrënguñie mëntsá endayana:

Bëngbe Bëtsá chë nÿe
cachënga uámanënga
tmojtse nobiamnangbe contra
entsemna,
y chë ndoñe uámanënga
montsenobiamnangbiamna,
Bëngbe Bëtsá más tšabe juabna
entsebomna ca.

⁷ Asna, tšëngaftanga
šmochtseprontana nÿe Bëngbe
Bëtsá chacmotsamëndama;
ntšamo Satanás tcmojtšamëndacá
ndoñe šmattsama, y cha cachora
tšëngaftangbentsana echantsachá.
⁸ Bëngbe Bëtsábioye šmochtobeconá, y
cha echanjama tšëngaftanga ntšamo
cha yomnama chacmotsësertánama.
Tšëngaftanga bacna soye amënga,
cach tšëngaftangbe cucuatšëngaca
tšabe soyënga šmochtsama, bacna
soyënga ndoñe. Tšëngaftanga chë
inÿe ora jtsejuabnayana Bëngbe Bëtsá
jtsebobonshánama, y inÿe orna, nÿe
quem luarentša soyënga jtsebomnama,
šmochtsajbaná bacna soyënga
jamama bošana, chca, nÿe tšabe
juabnënga tšëngaftangbe ainaniñe
chašmotsebomnama. ⁹ Tšëngaftangbe
bacna soyëngama ngménaca
šmochtsemna, šmochjenóbošachna
y cochtsetšënanënga
šmochjóyebuambaye.
Jatenbiajuayamna,
šmochjenóbošachna; y
joyejuayëngamna, ngménaca
šmochtsemna. ¹⁰ Bëngbe Bëtsabe
delante bëtsétsanga ndoñe

šmattsenobiamnaye, y cha más uámanënga cmochanjábiana.

**Inyëngbiama ndoñe ntsichámuana
ndoñe tšabá tmonjama ca**

¹¹ Jesucristbeyeca catšátanga, inyëngbiama bacna soyënga ndoñe šmattsóyebuambnaye. Nda cachabe catšatbiama bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsocumplínana y jtsichámuana chë leyentša mandënga tondayama yontsoserverna ca. Y chë leyama chca tcojtsichámëse, cach ley jocúmplia cuenta, contsobiamná canye ichamuá chë ley aïñe o ndoñe yondoservénama, y chca ndoñe quecmátsmëna jtsamana. ¹² Chë ley tojuapormá cha nÿe canÿa endmëna, Bëngbe Bëtsá, y cachá endmëna ntšamo entšanga tmojamcá aïñe o ndoñe tšabá bëtsemnana ichamuá, y cachánaca entsobena entšanga játsebacama o nÿetsca tescama jácastigama. Y acna, ÷ndase cmëna ndëmua entšabiámnaca jobjanayama jatichámuama ntšamo tojamcá aïñe o ndoñe tšabá bëtsemnana?

**Ndayá yëfse yochjatëchnënguama
ndoñe ntsótatšëmbuana**

¹³ Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëtš puebløye fchanjanga, y chentšë canÿe uata fchanjëftsemna ba soyënguïñe trabájayiñe, y ndegombre becá fchanjónÿena ca.” ¹⁴ ¡Pero ni mo ndayá yëfse tšëngaftangafaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebmna,

y chca, tšëngaftanga šmondmëna mo canÿe jantšëtëshcá, chëshe mora jónÿnana y nÿe ndeolpe jatenatjëmbana. Tšëngaftangafaca cachcá echanjopása. ¹⁵ Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” ¹⁶ Pero chë cuenta, tšëngaftanga bëtš soyënga šmochjamama sempre jtsenábotamnayana, ndayá tšëngaftanga chašmomama Bëngbe Bëtsá yochjalesenciácá ntsetatšëmbcá; y chca jtsamana ndoñe tšabá quenátsmëna. ¹⁷ Nda tojtsobena ntšamo tšabá yomncá jamama, pero ndoñe chca tonjama, cha canÿe bacna soye jtsamana.

Chë bomnënga jábuayenama

5 ¹ ¡Quem soye šmochjouena, tšëngaftanga chë bomnënga! ¡Chë tšëngaftanga šmochtsesufrínama šmochjenóbošachna y uatjananënga šmochtseyoye! ² Tšëngaftangbe bomnana buajónana janguánana entsemna, tondayama quenátoserverna, y chë entšayëjuangá mejëjonga montsasá. ³ Tšëngaftangbe castellano y midio tojtsengúsheshe; y chë ngúsheshna echántsinÿinÿnaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canÿe soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. ⁴ Tšëngaftanga chë tšëngaftangbe fshantsënguïñe tmojëftsetrabajanga ndoñe šmontanëbuénaye, y mora šmochjouena, chënga chama

cmontsachembuanama. Bëngbe Utabná nÿets obenana bomná, chë trabajayëngbe chembuanana ya tojouena. ⁵ Quem luarentëse tšëngaftanga šmondoyena ba botamana soyëngaca y nÿe ntšamo cach tšëngaftanga šmobošcá jtsamëse. Ntšamo canÿe uacná jóbana, minÿicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnama, er puerta bacna soyënga šmojama. ¡Chë castigo jtsebínÿnama tempo ya entsobeco! ⁶ Tšëngaftanga, chë puerta tšabá amëngbiana šmojayana jóbana yojtsemna ca y šmojtšëbaye, chca ndoñe chaondëtsemnama chënga ndocá jamama ntšobencá.

Chë uantado jtsemnana y chë Bëngbe Bëtsáftaca jencuëntama ora

⁷ Pero tšëngaftanga, catšátanga, uantádoca šmochjóbátma Bëngbe Utabná yochjésabo orscama. Chë jajañe trabajaya tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. ⁸ Tšëngaftángnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

⁹ Jesucristbeyeca catšátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá añe o ndoñe tšabá bëtsemnama, ya entsebeconá. ¹⁰ Atšbe catšátanga, chë

tempsquënga Bëngbe Bëtsabe juabna oyebuambnayënga, ndëmuanyënga entšanga tmonjanabuayená Bëngbe Utabná jótšëmbonëse, chënga bëngbiocyte šonjëftsaninÿanÿiye ntšamo tmojansufrima, ntšamo šojtsamna uantadënga jtsemnana tmojtšesufrina ora; y chca tšëngaftanga cmontsamna jtsamana. ¹¹ Bënga chëngbiana fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebonëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerta padecena soyënguiñe yojasufrina ora; y šmondétatšëmbo ntšamo Bëngbe Bëtsá cabana chábiocyte tbojancuedama, y chca yojamna Bëngbe Utabná entšangbiana puerta ngmená yómnyeyeca.

¹² Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga añe ca jayanama šmojtsebošëse, nÿe añe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

¹³ Nderado nda tšëngaftanguentšá puerta ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtšchuayama. ¹⁴ Nderado nda šocá tojtsemna, cha bontsemna chentša ošbuachiyëngcá anefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye

chamuanëtjuama. ¹⁵Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinyena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. ¹⁶Chíyecna, chë bacna soyënga šmojtsamama šmochjobuambaye, y Bëngbe Bëtsá nyetscangbiana šmochtseimpadana, chca, tšabá mo shnanëngcá chašmotsemnana. Canya ndabiama Bëngbe Bëtsá tojayana chabe bominyiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëts soyënga jamama. ¹⁷Bëngbe Bëtsabe juabna oyebuambnayá Elías, mo cach bëngcá canye entšá inamna, y puerte jtsošbuáchiyëse ndoñe

chaonduaftema Bëngbe Bëtsábioye tbojanimpadá ora, quem luariñe mo unga uata y tséntsañe ndoñe tonjanafté. ¹⁸Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojsatsbinýna.

¹⁹Atšbe catšátanga, nderado nda tšëngaftanguentšá tojtsajbaná chë ndegombre soyënga jtsamana, pero inya chábioye tbojuájabuache cachiñe chë tšabe benache cháuatishachama, ²⁰tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nyetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnana.